

*brío.* Manda una deposition, et scrive haver spazà questa matina uno a posta per Modon per saper el successo. Domenega a dì 22 setembrio Antonio Artagnoli zacentino questa matina zontò quì, vien da l'Archadia, qual tien botega a l'Arcadia, partito zuoba preterita da matina de lì, referisse che el mercore avanti de 18 di l'istante, un tureo et un greco de l'Arcadia andorono a Coron per veder di l'armata cesarea et ritornorono lì el zuoba avanti el partir de lui Antonio, et disseno come l'armata cesarea havea presa la tera de Coron el luni, et che el castelo anche per Turchi se teniva, et dice haver parlato con li diti olachi, et dice che el luni, marti et mercore preteriti ogni zorno venivano a l'Arcadia messi a dir come i combatavano Coron, per la qual cosa fono mandati i diti doi ulachi per saper la verità, et dice che zuoba quando lui Antonio se partìte de l'Arcadia, Zetal chadi andoe con 200 cavali per andar a Coron et a Modon et al Characha. Il venire lui intese da uno albanese come el dito Zetal era ritornato indrio a Patras, dice *etiam* che a l'Arcadia sono messi doi over tre homeni coronei in feri per lo agà dicendoli che erano traditori.

*Dil dito, di 25, ricevute a dì 13 Octubrio.* Come ha fuora li messi per tera et barche per mar per saper la verità, et manda questa relation :

*Die Mercurii 25 Septembris 1532.*

Nicola Theoderopulo et Manoli Mothenio zacentini, homeni mandati per el clarissimo proveditor a Modon et Coron per intender de li progressi cesarei, hozi ritornati referiscono: zuoba et venire preteriti 19 et 90 de l'istante a l'Arcadia et de lì per tera haver sentito molti tiri de artellaria, et sabato avanti zorno zonseno a Longa, luogo lontan da Coron miglia 6 in 7, et visteno che quel zorno fin a mezo el zorno le galie et nave cesaree trazevano tante bombarde che per el fumo non se vedevano, et da mezo zorno de sabado indrio a la qual hora fu un teramoto grande et non sentiteno più trar, ma vedevano le nave et galie arente de la tera et inteseno da molti et molti christiani come havean preso el castelo. Dicono *etiam* come cesarei el luni 16 de l'istante dismantorono in tera, con li quali si reduseno molti christiani paesani et combateteno fin mercore, nel qual zorno presero li borghi de Coron. Da mercore fin sabado come ho dito di sopra combateteno, et il sabado presero el castelo di Coron, dicono *etiam* Zetal chadi et el Para

flamburaro di la Morea erano a la Polania et a la Linaria et Zena ville poco luntan di Coron et arente a Modon con zerca 1000 tra a cavallo et a piè, turchi, et haveano amazato Stamati Pagadi coroneo, et che Piero Cocola era scampato dicendo vero esser che Coron è stà preso da christiani. Dicono *etiam* haver inteso dui christiani da Turchi esser stà presi in tempo de note, et a Longa esser stà messi al palo, et de più dice che dicevasi tre galie erano a Sapientia per far far calzine.

*Dil dito proveditor dil Zante, di 26 Septembrio, ricevute a dì 13 Octubrio.* Manda questa deposition, la qual dice cussì :

*Die Jovis 26 Septembris 1532.*

Gini Mostoluin zacentino uno de li nostri messi a Coron mandati, hozi ritornato referisse el marti passato haversi ritrovato in uno loco dito Andrusa dove el viste et intese dir come cesarei haveano presa l'ixola de Coron nominata Livadia, dil qual loco *etiam* vedeva et aldiva li colpi di le bombarde. Mercore poi andete a Castelfranco a hore 5 di zorno loco lontan di Coron zerca mia 6 dove erano cesarei con 4 galie, et li stete il mercore, zuoba, venire et sabado fina domenega in quel locho, et continuamente cesarei combateva il castello di Coron con bombarde da quatro bande, le nave erano da due bande, le galie al muolo, et haveano da una altra verso San Nicolò Sabionera cavato in tera artellarie, et sabato avanti zorno ge detero la bataia zeneral, et a mezo zorno lo preseno. Et dice che Zetal chadi era verso la Comata tra Coron et Modon con cavalli turchi et christiani a suo iudicio fin 200 in zerca, dice che scamparano assai de diti turchi et christiani; dice *etiam* haver inteso che cesarei volevano fabricar dove haveano ruinato.

*Dil capitano zeneral da mar, da Zefalonia, a dì 28 Septembrio, ricevute a dì 13 de Octubrio, manda la letera in greco scrisse Mustafà beì al Saguro, et una dil cadì de Patras scritta al proveditor dil Zante.* Per la qual si aprende il desiderio havea el capitano di la soa armata de abocarsi con mi, si ché fu ben fato fuzer di farlo. Scrive zerca el disarmar, et di 10 galie armate questo anno de qui da 4 o 5 di sopracomiti resteriano mal volentiera questa invernata fuori, poi non hanno il modo de mantener le galie non li mandando una bona sovenzione, quelle di Candia